

宋朝大詔令集

宋朝大詔令集卷第一百四十三

典禮二十八

原廟

建太祖神御殿詔景德四年二月癸酉

定鼎名區測主故壤書淵開與本底邦取則之都星渚流祥乃藝祖
挺生之地朕虔遵典禮躬詣山園亦既禮成遂茲臨幸載念神宗之
舊卽盜崇啓聖之仁祠欲煥皇猷式揚英烈爰就炳靈之地仰圖如
在之容慎擇鎔流莊嚴紺宇庶資景福以慰時思宜於西京建太祖
皇帝神御殿一如啟聖院制度

建景靈宮詔大中祥符五年十一月戊辰

仙源啟祚鴻慶非常爰經始於密都俾詢求於吉壤聿申嚴奉式煥
宏規惟文考在潛之宮乃冲人載誕之地據神明之隩處京邑之中

諒氣象之殊尤宜其靈之降格永惟欽翼翼保祺祥宜以錫慶院建
景靈宮

玉清昭應宮奉安畢曲赦

大中祥符六年五月丙午

國家席慶善之鴻基膺昊宮之景祐縣區率順寶籙垂文叶千載之
昌辰舉一王之茂典啓營恭館式耀珍圖偉嘉會以元亨荷太靈之
昭格決惟瑞應復出古先一昨鍊楚越之良金法紫清之妙像肅陳
仗衛迎致國都榮觀焜煌歡呼沸涌上真高聖凝三氣之殊姿英祖
神宗儼重瞳之粹質方畢朝修之禮彌增欽翼之誠動色相起降祥
允集宅靈秘宇永申崇奉之儀賜福羣倫宜沛覃延之澤可赦建安
軍揚州高郵軍楚州宿州泗亳州應天府見禁非人云云

建鴻慶宮詔

大中祥符七年正月丙辰

在昔聖王適追先烈或倕修原廟或模寫睟容所以伸繼孝之心紀

發祥之日國家九皇接統二帝授成積德深長垂裕丕顯肆于寡薄
獲紹慶靈爰因訪道之遊載歷興王之壤夙嚴靖宇以宅仙儀式增
壯棟之規仰奉在天之御永先地志益茂神休南京新修聖祖殿宜
號曰鴻慶宮仍奉安太祖太宗聖像

應天院奉安畢西京管内見禁減降德音

天禧元年六月壬申

門下奉先昭孝列辟之大猷有過推仁前經之格訓朕纂承鴻緒奄
宅中區曷嘗不念王業之艱難荷祖祫之眷佑克洽至寧之治彌增
永慕之懷惟浴師定鼎之都寶甄祖誕靈之壤興王之氣始兆於丕
祥布金之園聿新於崇構爰備彰施之彩虔圖辟穆之容臨遣輔臣
奉安秘宇苾芬之薦既罄於嚴恭油霈之恩宜覃於衆庶應西京管
內六月八日見禁罪人除故殺劫殺聞殺十惡官典犯賊不敢外雜
犯死罪降從流內情理切害者奏裁其餘流罪降從徒杖已上並放

修奉應天禪院使臣官負兵匠次第支賜其軍校始末祔事者具姓名以聞當議遷改奉迎執擎兵士並與支賜西京諸城內耆老年八十已上者厚加宴勞仍賜茶帛免本戶差役管內舊舉人將來科場與免取解應天禪院朔望許令士庶瞻禮於戲貽謀錫羨聊仰於威神布德均禧俾周於京邑庶協無疆之慶誕昭追遠之儀告于明庭咸體朕意

奉安真宗御容于西京應天院曲赦西京德音

天聖元年

門下朕以眇躬荷茲丕構務崇先烈爰考舊章炎漢名都頗存於原廟巨唐珍館率奉於辟容惟西洛之仁祠有兩朝之威像神靈所御禋薦克修是用模範聖儀就安秘宇時之元宰虔總於禮經祇協剛辰聿成於熙事上合祖宗之令典下符霜露之永懷况茲鼎卜之郊俯近日游之域足昭象物式罄寅恭載敷祝網之恩偏及交風之壤

應西京管内云云於戲天罔極以興歎敢忘於孝思禮建中而飾情
底叶於人紀布告羣品體予意焉

慈孝寺真宗神御殿皇太后塑像于側詔

天聖六年十一月丙辰

頃者肇營梵宇追薦祠宮仰駐靈遊肆開祕殿皇太后緬懷遺烈潛
發精衷哀戒工人塑像侍側興言懿實曾未布聞宜詔近司宣示于
外

奉安三聖御容于鴻慶宮曲赦南京德音

慶曆七年七月甲申

門下朕祗通先猷尊臨大寶寅畏御極勤儉保躬曷嘗不念帝業之
艱難仰宗社之眷佑誕孚至治增慕永懷惟睢陽畫壤之雄啟烈祖
興王之舊別都肇建靖館有嚴爰庀衆工一新崇構奉三后之睟表
卜萬世之永安克協剛辰聿成熙事天池日潤煥紫電以交輝聖德
神功亘終古而齊久思廣因心之孝用推及物之恩應南京畿內除

十惡并已殺人者及持杖行劫偷盜官物偽造符印放火官典犯入
已贓不赦外雜犯死罪已下遞降一等徒以下釋之應修鴻慶宮及
陪位官并執儀仗駕船軍士等並等弟與支賜本府諸縣夏稅特減
五分坊郭戶屋稅錢將支五分元係災傷倚閣二稅欠折官物本非
侵盜並與除放本府舉人諸科伍舉經省試及殿試者與免將來文
解父老年八千以上者並加勞酒食仍各賜絹二匹膳茶一斤其孝
行為鄉里所推者當議旌表祠廟之載祀典者並嚴潔致祭內商邱
火祠壇廟有頽毀處加完葺之於戲竭志奉先輝威靈之丕冒均休
覃下俾烝甸之旁周茂揚追遠之思以示無疆之慶告于中外體予
意焉

會聖宮應天院奉安神御畢德音西京

熙寧二年
五月甲午

門下朕祇紹前烈寵綏庶邦率時典常罔敢墜逸越茲有洛之內自

昔令王之都藝祖之所誕生迹存遺老寢園之所安奉神有餘威是用即西竺之仁祠因北訾之勝地儀刑二后鎮撫一方爰命宰司肅將使指鴻儀克舉熙事大成永惟繼甸之民能無供億之役宜敷渙澤用慰羣心應西京管内云云於戲稱秩精章克廣奉先之孝虧除有罪式昭惠下之仁咨爾羣倫咸體予意

原廟奉安畢赦天下制

元豐五年十一月乙酉

門下朕荷累聖之烈擁萬方之區永惟至艱靡敢違思常慮禮樂未具不足以紹制作之文衣冠出遊不足以憚嚴奉之意乃建上都之左壤是為真祖之殊廷肆營新宮華興寶構載差穀旦祗妥賅容于時日景晏溫天休之至體神之沛豈狀敢專落以斯于慶脩成於熙事布之渙汗庶木賡于多邦可大赦天下云云於戲揭虔安靈茲本禮經之意將瑕蕩故用昭神況之敷蓋制之所就者隆則澤之所流

者遠咨爾有衆宜體朕懷

太皇太后立神宗原廟詔

元祐元年正月甲寅

原廟之立所從來久矣前日神宗皇帝初卽祠宮並建寢殿以崇嚴祖考其孝可謂至矣今神宗既已升祔於故事當營館御以奉神靈而宮垣之東密接民里欲加開展則懼成煩擾欲採摺紳之議皆合帝后為一殿則慮無以稱神宗欽奉祖考之意間治隆殿後有園地以殿後推之本留以待未亡人也可卽其地立神宗原廟吾萬歲之後當從英宗皇帝於殿上以寧神明中以成君子之志下以安居民之心不亦善乎

會聖宮奉安神宗神御畢西京德音

元祐二年十月辛卯

門下朕以寡昧仰繼聖神顧瞻山陵未忘弓劍之慕益廣宗廟以奉衣冠之遊祇遣輔臣往嚴像設敬鳳臺之仙宇攀龜洛之仁祠辟表

一臨陪京增重山川改色方貢祥而効珍父老縱觀或太息而流涕
宜施雷雨之澤以答神人之心應西京管内見禁罪人除十惡殺盜
等罪至死不赦外死罪以下第降至杖並放應緣緹修迎奉官兵等
級頒賜其西京耆老八十已上者人給酒食茶絹常加存恤云云於
戲好生育物既推文母之慈崇德措刑終成神考之志咨爾有衆宜
體朕懷

名重光殿詔

景靈西京哲宗殿名寶慶而萬壽觀聖祖殿亦曰寶慶祖孫同稱於
義未允恭念哲宗皇帝聰明睿聖外攘驕悍鄰封內修隳廢法度紹
述烈考收功太平隆德盛業豈易殫舉其殿額若止以受寶之處為
寶未足昭著前人之光可改為重光殿

景靈西京成德音 四京畿內崇寧元年正

門下朕以眇躬嗣膺大庥洪惟神考之聖度越成周之隆憲章修明
禮樂備具內輯諸夏外賓四夷更十九年齊天地之化育亘千萬世
依日月之照臨念成功之難名窮備物而莫報迺眷中都之右壤載
營寶構之新宮敕旦肅消昨容遷安昭茲館御之首奄為前烈之光
焜燿無垠尊崇有闡偉大明之制作恢永祐之規模祇率臣鄰躬行
禮奠霜露既降興言悽愴之懷衣冠出遊儼若威靈之在上以隆國
家之制下以聳民人之瞻稽協先猷用頌渙澤應四京畿內云云於
戲廓斯闕宇於昭先人之功乎以恩書庸廣大孝之本肆均神既敷
佑黎氓咨爾羣倫體予至意

西京奉安哲宗御容畢曲款西京

崇寧二年三月五日

門下朕撫運重熙承祧永泰釁馭從莽風畏軒臺之靈衣冠出遊遠
追漢廟之廣祇遣近輔肅將昨容趨六聖之會宮即三川之梵宇旁

開館御仰對威神消選嘉時舉行舊典慰華夏之衆望揚宗社之闕
休言念工徒咸謹繕修之役載瞻伏衛率殫護從之勞其布渙恩以
綏列甸應西京營內云云於戲奉先盡禮將致友恭之心厚下施仁
當流寬大之澤咨爾黎庶體予顧懷

徽猷建殿閣成奉安訖德音

政和四年十月八日

門下朕踐修令緒駿惠大猷貽厥孫謀敢念奉先之志昭哉嗣服益
隆報本之誠乃即禁庭更新寶構奉辟儀於祕殿闕闕蓂莢於西清觀
模皆蔽於朕心工役不煩於民力棖題增煥像設具嚴河圖洛書聚
昭回之在望雲車風馬想馨歆以如聞仰以燕在天之神俯以示斯
民之教既告成於熙事宜均慶於羣倫云云於戲刑期無刑恩莫隆
於肆青孝乎惟孝愛用廣於因親咨爾多方體予至意

宣祖昭武皇帝昭憲皇后忌前一日不坐忌日羣臣進名行香禁屠廢務詔 大中祥符二年九月丁亥

恭以宣祖昭武皇帝昭憲皇后夙蘊慶靈克昌

載誕二聖奄宅

萬邦猥承燕翼之謨深惟似續之重每臨諱日尤切承懷式伸尊祖之誠以罄奉先之禮自念忌前一日不生忌日羣臣進名行香禁屠廢務著于令式

陵寢

太宗山陵畢兩京畿內死罪以下減降德音

至道三年十一月丙寅

門下朕欽奉丕圖允升大寶將繼太宗之業式恢寰海之基何嘗不廢寢遐思忘殯廣訪虔虔翼翼行之猶恐不及者蓋欲臻於平泰致於阜康爰成開物之功用表奉先之志近者因山展禮率土咸觀風師颯爾以掃塗共歛塵靜水伯冷然而通沍成歎醴甘神休聿彰永

命斯見宜舉欽崇之典俾昭感格之符推兩京戶民祇奉陵邑既云
集事良表能忠特行禮恤之恩斯慰勤勞之役應兩京云云於戲理
國之宜安民為本將國明允必賴典彝法覆燾以制儀生成雖一俾
陰陽而申令勸誠則殊期懷德以畏威故褒善而貶惡永言垂教良
俟措刑適當行解之初爰示閑邪之旨更資列位咸勵勤行庶成肅
穆之風長播宣慈之化告示中外知朕意焉

詳定康陵定陵詔

景德元年七月壬寅

康陵定陵已經迎奉將修兆域朕以園陵之事邦家大經開國之初
已曾會議尋建陵號尚虛神寢而有司抗表屢有所陳且以二寢尚
居清苑朕以事闕宗廟理合審詳周訪羣言皆云有據朕猶存重慎
益廣咨詢至于命中使以經營委藩侯而訪察繼觀來表咸曰無疑
復俾大臣再陳定議遂有迎奉之請用慰追遠之誠既觀僉同式稽

禮典於是遽之梵刹營此寢園今則安厝有期儀制將舉朕偶從餘暇肆閱羣編因覽太祖實錄明載二陵所在復又不指某州卷言夙宵未免疑惑况奉先之事垂世大猷務叶禮經所宜明允可令中書門下與樞密院詳定以聞

上陵詔 景德三年八月庚辰

朕仰膺眷祐獲紹慶基馴至小康垂將十稔永懷先烈敢忘時思頃以還封猶煩征戍上陵之禮曠歲莫伸今異域同和編氓樂業載瞻園寢式展孝恭朕以來年春朝拜諸陵宜令所司各揚其職凡百費用以官物充一路但增修館驛以脩行宮應役臣百司供擬供御並從省約經由州縣所用什物亦令預先置辦不得差役科率諸司須索非勅命州縣不得供給鄰近州府長吏不得擅離本任赴行在諸路勿以進奉為名輒有配率具起居表章附驛以聞

躬謁陵寢西京諸路繫因減降德音

景德四年正月丁卯

門下王者奉先追遠所以致孝於祖宗宥過綏刑所以推恩於寓縣朕仰膺眷命獲紹慶基每勤夕惕之心用布日新之政逮茲十稔馴致小康念思文長發之祥荷燕翼貽謀之訓寢陵密邇脩謁未遑日月居諸永懷固極爰稽典禮式展孝思祇率官師躬伸朝拜載瞻封樹肅奠几筵俛薦馨香如聞馨歆聖靈垂鑒涕泗無從罄夙夜以潔誠既陳庶祀順陽春而布澤恩被羣黎宜覃及物之仁用慰履霜之感除東京已降德音外西京及諸路

云云

於戲親朝列聖慰霜露之時思行慶萬邦法雲雨之平施庶黎民之受賜俾率土以咸休誕告中區當體予意

遣王旦等告祭諸陵詔

景德四年三月乙酉

朕永懷烈聖躬謁寢園俯徇羣情暫臨鼎邑既盡哀於霜露亦布澤

於陽春而言旋都畿再面陵域仰威神而在望志切奉辭稽簡冊於舊章禮煩斯黷內惟罔極昌表至誠恭遣大臣特陳明祀庶遠精虔之懇以申追慕之心宜遣工部尚書平章事王旦祭告諸帝陵吏部尚書張齊賢祭告諸后陵

山陵逐項不得科率詔

乾興元年三月丙申

朕荷穹昊之眷懷纂祖宗之成憲慎乃出令先於愛人恭念復土有期因山垂制方興力役彌軫孝思慮尚擾於齊民特申明於前訓應山陵逐項錢帛糧草及使用什物並官為辦給不得科率人民

昭陵不得科人民詔

勅中書門下朕駿膺顯命欽述先猷載惟發政之初首及愛民之務瞻言浴土之奧大啓昭陵之封庀徒衆興調費百出慮征繇之橫起傷儉素之遺聞感發至懷重申前訓應山陵一行并逐項合用錢帛

粮草及凡百動用物色仰三司轉運司並須擘畫般輦及將官物修置供給不得科率差配人民勉思裁辦毋致煩勞咨爾攸司當體朕意仍仰出榜曉示人戶各令知委故茲詔示想宜知悉

山陵無輒科率煩民詔

治平四年二月戊子

大行皇帝身先四方克勤克儉惟厲精於庶政用保惠於兆民故其遷几之言慮及因山之制所用錢帛粮草凡應奉物委三司轉運司計置官物供給無輒科率煩民

太皇太后山陵遵遺詔儉省諸道不得進助詔

元祐八年九月壬辰

朕恭以太皇太后保祖宗之基命定社稷之永圖德參二儀功冠千古今普天喪恃四海同哀雖築陵高於太山備禮殯於萬物顧無以報亦未為多惟遵奉於訓言益光昭於儉德以對在天之盛烈以揚愛物之遺仁緣山陵非久修奉慮有司遇有煩勞枉費人力不能仰

承遺誥務遵儉省之意其令尚書戶部斟酌應副毋得寬剩計置除
西京路轉運司目合供辦其諸道非拋降毋得妄有進助咨爾中外
當體朕懷

陵名

宰相丁謂奏大行皇帝陵名鎮陵狀

伏以龍駕登真奄纏悲於厭世鮒隅卜遠方度寵於因山率遵同軌
之期將歲祖庭之禮恭循茂典仰薦表稱大行皇帝陵名伏請以鎮
陵為名詔恭依

宰相韓琦奏大行皇帝陵名永昭狀

北域之圖按禮經而伊始因山之固奉大訓以惟嚴宜立嘉名上符
至德大行皇帝仁無不浹道極莫稱開壽域以濟民咸歸聖治建善
經而長世生致時雍豈徒超越於百王固以光輝於萬世大行皇帝

陵謹請以永昭為名從之

宰相韓琦奏大行皇帝陵名永厚狀

因山而葬將循虞舜之宏規就水為名復舉漢文之故事詢于鄙陋
曷足形容伏以大行皇帝以上聖之資繼景炎之祚聖心欲治方圖
庶事之康天意難忱不降萬年之福此方中之始寔宜復土而有稱
夫唯盛德之無前固與方興而同厚大行皇帝陵謹請以永厚為名
宰相請大行陵名永裕狀

伏以漢營霸水曾不改其舊川唐卜醴泉遂終藏於去劍緬追故事
並建嘉名恭惟大行皇帝道與天同才非世出振易邦制規恢三代
之摹作新帝文博盡天經之學永勒金泥之檢蚤驚玉几之言占龜
洛之勝時得鳳臺之吉兆行襄大事固有神靈之扶垂裕萬邦永為
子孫之制大行皇帝山陵伏請名為永裕陵

宰相章惇奏大行皇帝陵名狀

僊鼎遽成龍湖莫挽爰占兆域將掩衣冠俾厯選於嘉封示致嚴於
大事伏以大行皇帝道該三極威攝萬方於昭前人之光允貽後世
之憲華戎期於同軌衆庶請於因山稽諸龜策之靈得此崗原之吉
建休祥之所聚治泰定以無窮大行皇帝陵請以永泰為名候勅旨
奉聖旨依

宋朝大詔令集卷第一百四十四

典禮二十九

紀節

改用七日為七夕節詔

太平興國三年七月乙酉

七夕佳辰著于式令近代多用六日實紊舊章訛俗相承未之或改自今宜以七日為七日仍令頒行天下為定制

建天慶節詔

大中祥符元年十一月庚辰

圓穹降鑒瑞檢騰文徇中外之僉謀塞神祇之疑望升中鉅嶽霈澤綿區紀茲受命之辰庶廣承休之樂宜以正月三日天書降日為天慶節休假五日西京諸路就長吏公署或宮觀建道場七日京城寺觀燃燈許臣民宴樂其月已斷屠宰更不處分

先天降聖節日令天下以延壽帶續命縷保生酒更相贈遺

詔大中祥符六年六月辛未

近者祇格真游欽聞寶誨惟孟秋之上朔暨陽月之下弦肇建節名
已存令甲思宏模而增盛俾蕃祉而誕敷稽舊史之文載頒於明制
徇與人之欲益煥於珍圖先天降聖節日今天下以延壽帶續命縷
保生酒更相贈遺著于甲令

立天祥節詔天禧元年正月壬戌

大中祥符元年四月一日天書再降內中功德園自欽承於中禁唯
容奉於清場近者茂對靈心宣聞朝著虔遵寶訓彌勵精衷用建節
名宜昭帝貺宜以其日為天祥節如天貺節之制

十一月五日為天應節御筆手詔政和四年二月一日

朕嗣承丕構夙夜祗若惟道是興惟上帝是承消選休辰恭修祀事
備物盡志咸秩無文荷帝懋臨如在其上旌旗輦輅冠服仗衛見於

雲際萬象咸睹惟天人之感通有形聲之相接靈承對越敢不祗饗
可以其日為天應節用端命于上帝以昭荅於神休咨爾萬邦其體
朕意

朝賀

中外除拜正衙謝辭詔 太平興國元年十一月

外朝之設舊章不忘近年事出權宜多從沿革凡除拜出入不由正
衙辭謝有司既失於舉行經制遂成於寢廢自今中外官除拜假使
出入並須於正衙辭謝違者有司議其罰

誠約朝會虔恭詔 太平興國五年十月丁未

表著之設蓋有等威闕庭之儀所務恭肅故離立俗談者罰之所及
蹴芻齒路者誅之必加所以辯名器之差正班爵之序賈生設堂陛
之喻蓋明天子之尊叔孫造綿蕞之文式彰王者之貴抑有異訓布

于格言五代以來舊章多廢胥徒市賈多齒於周行朝覲會同罔知於王制遂至褻慢殊失矜莊浸以成風因之不改方屬成平之始宜申公堂之規應文武百官自今宜令有司通行布告凡遇朝會各務恭虔每內殿起居即須踧踏入門雍容就列稍步不謹便同失儀朝堂素有典彛憲臺並須振舉恪居官次稱朕意焉

誠飭文武官立班不得違慢詔

大中祥符五年十一月辛未

朝廷之儀禮經有制所以明上下之式序示堂陛之有嚴而表著之間頗聞褻慢紀綱之任曾不糾絕有紊憲章宜申儆勵應文武羣臣趨朝立班及崇政殿引見官員使臣自今違慢者仰閣門御史臺彈奏

中書門下請旬休及諸休并有寒雨雪特放朝日兼後殿不坐表詔
大中祥符九年二月戊戌

朕仰承丕訓恭守鴻圖迄致治平彌懷厲翼所以外朝既罷便坐再臨每休假之在辰亦恭親而無輟至于旰食靡覺煩勞雖四海密清萬務稀簡然於聽斷豈敢怠遑當體至懷無煩確論所請宜不允

雙日不坐詔

乾興元年三月戊寅

準今月九日詔勅中書門下禮儀院奉中書進呈雙日視事雙日不坐五日前殿起居奉聖旨送禮儀院者今參詳欲自三月十五日禪除後不以雙日雙日百官並依倒常朝并五日一度赴前殿起居外如遇雙日即皇帝視事雙日前後殿不坐其餘休務并假日並依舊例其隻日如值假節只於崇政殿或承明殿視事朕仰承先訓肇續慶基思與忠賢日勤聽覽至於宵旰非敢怠遑卿等任重佐邦道隆體國協于僉論陳此奏章稽舊典之攸中為視事之經制裁惟明識諒合通規然每屬於清閒亦靡圖於暇逸當延侍從講習藝文勉徇

嘉謀用依來請所奏宜允其雙日不視事或遇政務稍暇即當宣召侍臣入侍講讀故茲詔示想宜知悉

每日前殿視事詔明道二年十月二十日壬子

朕欽膺啟命寅紹慶基率遵簡易之風勉荷承平之業洪惟先聖丕顯大猷屬四方無事之辰有隻日視朝之制逮于冲質獲稟成規訖臻大寧垂茲一紀懼德弗類幸懷永圖念守文之固難思置器之尤重幅員至廣庶務繁僮或墜於不情安能召於和氣當憂勞而靡暇在旰食而豈遑用詔近司載頒定式十一月一日已後每日於前殿視事其餘休務并假日並依舊例一二萬幾躬勤於聽覽股肱三事同罄於謨明惟文武之具僚泊中外之庶職勵乃首公之節副予求理之心故茲詔示想宜知悉

宰臣呂夷簡等上表批荅景祐元年九月六日壬辰

朕丕承祖宗之烈司牧億兆之人一紀于茲萬邦咸乂禮興樂舉俗
阜刑清賴天地社稷之靈成寬仁安靜之俗至於臨御之久敢忘旰
吳之勤今卿等體國誠深致君道廣且謂機事多暇聲教誕敷軍國
之宜率奉東彝之訓賞罰之制並存畫一之規而猶程衡便坐乾道
尚簡豈若是乎願以剛辰進臨於前殿其餘日間御於臨軒以王者
親總懿綱宣揚醜化推心於人腹則易信置器於平地則易安是以
勞於求賢逸於任使朕方守神明之位任股肱之良至於會朝之儀
詎專煩數之禮求其折中庶示悠長且念侍從之班職局有守將校
之列營舍甚遠夜未艾而風興屋既明而旅進亦云勞止頗軫予衷
況大舜垂衣而為功隋文傳殮而致誚今覽所請深協其宜又以弼
亮之臣咨訪攸屬其雙日內如中書樞密院有台奏公事當議便殿
臨對責於閒宴以納謀猷緊爾具條體茲深意所請宜允

日御前殿詔寶元元年一月庚午

朕惟聽朝之令初無分日之義間徇羣書畫圖簡政然萬機之務臞
常失於隱微且四近之臣思日勤於咨訪式資勤治以布新規其自
今月五日以後日御前殿視事

今中書密院常程奏事外別有所陳不限時刻詔慶曆三年

七月辛未

朕嗣守先基高處宸極夙夜寅畏踰二十年永惟祖宗之鴻烈歷考
皇王之令典循東漢之曩制勤每旦以臨朝廷見羣臣講修庶政者
惟台輔之職實總微幾之繁倚矚甚深諮詢無間且當世要務經圖
顯謀其於啟沃之間必有從容之論雖至中異朕何怠焉自今中書
樞密院臣僚除常程奏事之外如別有所陳政事及朕非時留對並
不恨時刻

巡幸

幸軍前詔

建隆元年五月丁巳

朕仰膺天聰肇啟皇圖念可畏之非民敢無名而動衆李筠不知天命犯我王誅奔帶河殲岳之恩為干紀亂常之事已行攻討即俟盪平當九夏之炎蒸念六師之勞苦深居宮闕情所難安常議省巡用仲慰撫朕取此月內暫幸軍前所司供頓務從儉約郡國長吏不得擅赴行朝兩京留司官起居表章可傳置以聞勿令勞擾以稱朕意

幸揚州詔

建隆元年十月丁亥

朕以叛臣負國兇黨嬰城勞將帥以征行救生靈之塗炭重念蒙犯霜露跋涉山川將親示於撫巡須暫離於京闕朕取今月內幸揚州凡所供須務令省約方期靖亂無至勞人餘依征澤潞詔書從事

歸京詔

開寶九年四月甲辰

朕以克平江表告謝上元爰臨卜洛之郊已展就陽之禮既畢祀事
宜還上都朕取此月內歸京

幸鎮州詔 太平興國四年二月辛亥

王者肆覲群后存問百年因茲龜筮之祥會於方岳之下所以巡諸
侯之守達遠民之情斯為舊章豈可暫廢茲河朔控乃邊陲翠華
久曠於豫遊比屋賢懸於瞻望宜親巡於疆場庶躬撫於士民慰其
俟后之心用展省方之義擲風沐雨朕無憚焉朕今暫幸鎮州以此
月內進發沿路供頓並從簡儉凡百費用悉以官充不得民間輒有
科率諸司不得於州縣輒有須索車駕經過州府縣鎮並不得於道
路排比香臺畫甍青繩欄干等物近處節度防團刺史知州等不得
輒離任所來赴朝覲兩京留司官內請州屯戍將校上表起居並附
驛置以間應經過州府外縣鎮官吏並不得輒以褻儀為獻

幸還陞詔 太平興國五年十一月己酉

邊境多虞寇戎猶梗介冑之士息肩未遑樽俎之籌折衝靡暇兩河之際列鄣相望烽火時至於近郊羽檄尚馳於絕塞是用大徵戈甲遠殄氛霾昔者師人多寒楚子所以躬撫匈奴未滅漢武於是親巡蓋以慰虎旅之心破西戎之膽雖在窮冬之候敢辭風駕之勞朕取此月暫幸還陞親撫士卒應經過頓舍凡百費用悉以官充所在不得輒有哀歛諸司須索非有勅命州縣不得供給馳道左右並不得排比香臺畫甍青繩闌干等物鄰近州府長吏各司其局不得輒離本任來赴行在亦不得以貢奉為名敢有科率兩京留司及諸州起居表疏並附驛置以聞

幸河北詔

朕惟念遠圖冀寧中夏而邊鎖之俗尚恣貪婪侵軼我邊防繹歷我

黎庶是用當食而嘆投袂以興整七萃之師幸兩河之壤蓋所以慰
編氓之徯望撫戎士之多寒朕取今月五日暫幸河北應經遇頓舍
凡百費用悉從官給所在不得輒有率歛諸司須索非勅命州縣不
得供億兩京諸州起居表疏附驛以聞

幸西京詔景德四年正月丁卯

朕以春露既降時感載深祗詣寢園躬申酌奠蓋達誠於慕孺非取
樂於豫遊瞻彼三川時惟二宅而守藩之長留局之臣耆耄之民縉
黃之衆翹心望幸投袂拜章況數舍之匪遙且群情之至確式回輿
駕言歷舊都慰其徯仰之心舉此省廵之典朕以來月二日暫幸西
京所司準式

遊觀

十七十八夜張燈詔

乾德五年正月甲辰

上元張燈舊止三夜今朝廷無事區寓乂安況當年穀之豐宜從士
民之樂具令開封府更放十七十八兩夜燈

幸開封府射堂曲款東京畿縣見禁制

大中祥符三年閏二
月丁卯

門下王者守文致治稽古御圖節遊豫之期率從於夏諺覃僕望之
慶允叶於商書內愧眇躬獲膺大寶昔奉遵於先訓頗曲被於鴻慈
爰錫命以登儲仍尹京而愬試所臨民政動稟朝經實未著於元良
因靡加於寵數隣於公府建以華宮俾於退食之居用擬宣猷之地
暨承祧之務重曠命駕以斯來適會餘閑輒茲遊覽頗動因心之感
但增濡露之懷乃春公王特陳宴射浩穰之邑宜給於優恩近密之
臣仍加於茂錫以應陽和之候曲成煦育之仁應東京云云於戲隆
盛之基永懷於積慶涵濡之澤特示於惟新咨爾群臣體予深意

名繼照堂詔

大中祥符三年
閏二月丙戌

朕頃在儲闈允鑒京邑仰承訓導幸辰密清爰就公庭載營宏備俾
因聽訟之暇用為習射之娛入綴邦基載移星律乘陽春之布令擁
法從以來臨感慶兼深惠賚胥洽式徇宰司之議易茲題榜之名庶
增煥於黃圖永流芳於覆圃其開封府舊射堂名曰繼照堂今設帶
張樂許士庶遊觀三日

在京景靈宮成放士庶遊看詔

朕以仰膺靈睬茂對貢遊祇咎殊祥聿伸嚴奉惟都畿之福地當天
下之奧區聖迹昭然鴻儀備舉特崇華構式示無疆庶工子來既成
於大壯萬方輻湊俾遂於榮觀仍擇吉辰先陳清醴遐邇諒同於慶
悅小大宜鑒於膏肓

宋朝大詔令集卷第一百四十五

典禮二十

宴集

賜酺詔 雍熙元年十二月乙酉

王者賜酺推恩與衆共樂所以表昇平之盛事契億兆之歡心累朝以來此事久廢蓋逢多故莫舉舊章今四海混同萬民康泰嚴禋始畢慶澤均行宜從士庶之情共慶休明之運可賜大酺三日

誠約朝會端肅詔 景德二年九月壬子

朝會陳儀衣冠就列將以訓上下之則彰文物之容宜慎等威用符紀律況屢頒於條令宜自顧於典刑稍歷歲時漸成懈慢特申明制以警具寮自今宴會宜令御史臺預定位次告示各令端肅不得誼譁違者殿上委大夫中丞丞殿委知雜御史侍御史廊下委左右巡

使察視彈奏內職殿直已上赴起居入殿庭行私禮者委閤門彈奏
軍負令殿前侍衛司各差都校一人提轄有虧失禮容即送所屬勘
斷訖奏仍令閤門宣徽使互相察舉敢蔽匿者糾之

令中外宴衍詔

景德三年九月庚戌

易簡可以便民慈惠可以布政由庚萬物乃合大和頃者戎事稍繁
宵衣在念精求治本庶及時雍中外之臣方勤率職宴衍之事未暇
賞心當今稼穡屢登機務多暇嘉與羣品適茲泰寧自今士民任選
勝宴樂内外文武羣臣不妨公務並許遊從御史臺金吾皇城司勿
復糾察内外百司除舊例給假外每月旬假上已二社重午重陽並
休務一日三司開封府事關急速不在此限文武職官軍負將校遇
祁寒酷暑大雨雪當議放朝布告羣倫著於甲令

致仕官赴都亭驛酬宴詔

大中祥符元年正月己丑

朕以錫符有慶合飲申恩春言耆艾之臣方從休致之適衍樂之際
飲賜宜均用敦尚齒之規以叶燕毛之禮應致仕官宜令並赴都亭
驛醕宴其御樓日合預坐者亦聽

賜醕詔 大中祥符元年十日

朕既展封祀乃巡候藩春茲禮義之邦實控神靈之域宜均愷樂式
慰後來兗州特賜醕三日

京師賜醕詔 大中祥符元年十二月辛亥

朕躬升喬嶽祗建靈封爰敷肆育之恩俾均合歡之宴矧大衆所集
乃曰京師四方所瞻茲惟天色當陽春之啟候俯中和之屆辰特命
宴私用宣絕嘏東京賜醕五日以來年二月五日為始

誠約內外羣臣不得非時廣為聚會淹延刑禁詔 大中祥符
二年四月

萬務之繁庶官共治念夙宵之匪懈俾休沐以推恩用紓幹蠱之勞
期洽和平之化乃有靡因暇日妄託虛名恣羣飲之誼譴薄下民之
新訟因循至是曠廢居多俾肅慢官再從申諭自今內外羣臣每遇
休假不妨公務聽前詔遊宴不得非時廣為聚會淹延刑禁致部
民無告遠者當重論其罪

天貺節賜會詔

大中祥符四年六月丙午

向者岱宗福地朱夏良辰誕錫靈文著為令節共樂非常之祐宜推
式宴之恩天貺節宰臣親王於上清宮行香畢宜賜齊會

同列出使許出錢給休假詔

大中祥符五年五月丙子

秦故之情風義攸重飲錢之禮典籍具存矧承平之在辰諒官局之
多暇式敷和樂俾遊燕私自今兩省五品尚書省四品諸司三品已
上官同列出使並許出錢仍給休假一日餘官有親屬僚友出行任

以休務日餞送

賜酺詔 大中祥符六年正月己酉

昨以吉夢開先真游臨格述僊源於太古祚皇祚於無疆祇受純禧
膺覃渥惠將盛陳於合飲庶親問於高年已申誕告之文俯及載陽
之序中和育物允契於良辰宴衍宣恩宜頒於美澤東京所賜酺五
日以二月六日為始

賜酺詔 大中祥符九年四月丙申

真輿降鑒寶系開祥度雲構以甫成疇颺輿之來格蔚為勝壤永壯
中畿承錫美於中枋誕膺介福洽均禧於溥率用表多歡東京賜酺
五日西京南京三日諸州軍監一日父老委逐縣量地里近遠以賜
酺日告諭勿得預有呼集有疾不赴者勿強之

賜酺詔 天禧元年九月丁未

朕欽崇寶帑營建真庭逮茲成室之初載洽溥天之澤宜均宴衍以暢歡康在京賜酺五日以二月三日為始

在京賜酺詔天禧四年九月壬申

朕祇若靈命撫臨庶邦荷宗社之發祥洽清寧之並配方隅底定表裏咸和屬素律之協辰慶甫田之告稔稽于前典與著合飲之明文乃脊上都實異方之交湊思延兒齒廣惠衢鑄在京可賜酺五日

令陳堯咨為鄜延等路安撫使仍令訪民間利害群臣能否等詔天禧四年十一月丁卯

朕惠養群黎勤勞庶政于戈載戢久臻下武之期朝野多歡宜布及私之澤眷茲列郡實介西陸爰輟近臣往頒宴犒至於官吏之治行州縣之征徭宿負之未蠲滯訟之或訴即當平處並以敷聞仍決薄刑誕敷寬詔宜令陳堯咨等所至州軍犒設官吏將校訪民間利害

羣臣能否功過以聞或有陳訴屈抑經轉運提點司區斷不當即按
鞠詣實杖以下區理徒已下飛驛以聞仍取繫囚躬親錄問催促論
決

賜酺詔

天禧五年二月丙寅

朕每念烝民之重宜思庶獄之繁中宵疚懷當食輿歎屢申戒勵冀
免滯淹春乃攸司克遵朝旨削封章而來上述案牘之無留圉固盡
空憲令幾措而又青春在序玉燭揚明百卉芳華羣生茂遂降康之
慶豈獨在於眇冲合飲之歡所宜均於遠邇在京賜酺五日兩京三
日諸州各一日

貢獻

蜀省釵隴等州土貢詔

景祐四年閏五月戊辰

任土貢輸雖在舊典經塗遐邇亦念重勞特用推恩俾從蜀省三司

所定釵隴等三十九州軍所貢土物並與減放愛賀等二十七州軍
悉罷所貢每歲正旦具表以聞諸州長吏不得以土貢為名因緣配
率務於便民以稱朕意

罷諸州軍每歲進茶詔 大中祥符元年六月壬子

茗薺所產風壤之宜綿越歲時聿修貢禮念賁持之期遠慮賦率之
為勞思便下民聿傳常獻其諸州軍每歲進茶並宜停罷

罷諸州貢務詔

治平四年四月壬申諸州貢物名件自澤州
山薑花一萬朵已下至楊梅二十顆九七十粒

四方入貢雖云古禮考之禹制未有若茲之繁也今則一郡歲有三
四而至者言念道路之勤疲費亦廣至聞主押牙校有棄業終身不
能償者耗蠹民力莫不由斯又所貢物多飲食之類雖闕之亦無害
也書不云乎不作無益害有益非此謂耶朕甚不取其自今寢之

新附州軍收買貢物答強淵明御筆 大觀二年四月一日

大禹克儉而任土作貢備天下之百物納錫於上理所當然今新造之邦未制貢輸之物可依所奏令尚書省參酌中制以聞並置場高價收買不得差科勞民

臣僚上言供貢御筆政和八年二月二十六日

朕君臨萬邦富有四海天下之奉何有所闕除依歲格任土作貢外未始許其抑配科率詔詰訓飭止絕擅擾形于翰墨于寧備至未嘗以寬科率之刑間有御前自京給降見錢度牒銀絹付諸路監司於出產州軍仍以市價私相和買口味木石之類者有之以備薦饗宗廟頒宣大臣戚里亦非以專於奉己為事監司敢以御前錢物計置到物為己有以充苞苴饋獻罔上弗虔罪何可追當重為之禁今後有犯以大不恭論不以赦降去官原減違者御史臺糾劾以聞

弋獵

狩近郊所獲禽獸薦饗太廟詔 雍正二年十二月壬午

順時蒐狩禮有舊章非敢取樂於畋遊蓋欲薦誠於宗廟久隳前制
闕孰甚焉今者暫狩近郊爰遵時令其以所獲禽獸付有司薦饗太
廟永以為式

罷畋遊放五坊鷹犬禁諸州不得獻鷹犬詔 端拱元年十月
癸未

蒐狩之禮先王所以順時令而講武事也逮夫失道遂成禽荒故五
子有洛汭之歌長卿陳上林之諷明監不遠餘風未愆朕惟懷永圖
思章前弊庶協好生之德用孚解網之仁起自今後除有司順時行
禮外朕非時更不於近郊畋遊其五坊鷹犬並放之仍令諸州更不
得以鷹犬來獻

還越保忠獻海東青詔 淳化三年十一月乙卯

朕久罷畋遊盡放鷹犬無所事此卿地近邊塞時出捕獵以講武事

今選以賜卿可領之也

縱鷹鵞詔 大中祥符二年六月壬寅

三駟之禮足表於好生四時之田寧務於多殺且鷹隼為用羽獵所資爰自先朝已頒明詔釋茲猛鷙靡事畋遊豈止開三面之羅蓋盡廢五坊之職仍以風駕載燧無失諸侯之舊章以時給鮮止備戚藩之講事鳥獸以之咸若鷹卵由是不傷而有司奉行未得周悉搏繫之類學習尚存朕躬荷慶輝志崇清淨思申明於皇訓庶虔守於聖謨其教駿所養鷹鵞除量留十餘以備諸王從時展禮外自餘並去其羈紲縱之山林無得便有蓄養

放鷹犬詔

天禧元年四月乙卯

朕自膺瑞命即絕畋遊蒐獵之郊咸恣其耕墾羽毛之族盡罷於禁維其或詔蹕時巡官司景從員累弋獵禁止甚嚴動植昆跂毫芒靡

犯廢乎品彙普洽至和但以每歲殊隣常用鵲會充臚執而將命誠
叶禮文潤彼見霸深還物性釋其籠檻俾遂飛翔其所養鴈鸛獵犬
五十三頭宜令入內侍省因投龍簡使臣賁放名山高僻之所

宋朝大詔全集卷一百四十五

宋朝大詔令集卷第一百四十六

典禮三十一

喪服上

皇太后喪百官第三表請聽政答詔

建隆二年六月己亥

朕奄屬閔凶方集荼蓼慕殞絕苦若無所容數日以來五情糜潰而百辟卿士三上封章勉予以一日萬幾誨予以毀不滅性俯從來請哀噫良深

皇太后喪除百官三上表請舉樂答詔

建隆四年六月庚子

朕積蒙上延禍鍾長樂雖軍國之事敢不勉旃而人子之情實惟永感固於雅奏焉思遽聞卿等援引古今繼陳章表明先王之制禮俾涼德以俯從式徇羣情良深增愧所請宜允

令子弟因父凡歿收叙未經百日不得公參詔

淳化五年七月壬午

孝居百行之先喪有三年之制著於禮典以厚人倫中外文武官子弟因父兄之淪亡因朝廷之收序未及卒哭因以脫縗遽忘哀戚之容不念劬勞之報雖黽勉從事克遵匪懈之言而創鉅因心殊乖未忍之意自今文武百官子弟因父兄歿收叙未經百日不得輒赴公參御史臺專加糾察并有冒哀求仕釋服從吉者並以名聞奏

秋宴以安王卒不舉樂詔

成平六年九月己丑

朕痛切友于時常燕饗修俎豆之事禮則有常聽金石之音情所未忍其秋宴宜不舉樂

宗室心喪詔

景德元年九月丙午

葬而除服雖俯就於禮文孝以奉先宜永懷於創鉅在於望族合守心喪庶全攀慕之誠以畢外祥之制

答群臣請舉樂表詔景德元年十月辛丑

朕自長樂升遐昊天增感以日易月奄終祥禪之期臨軒視朝勉從軍國之務卿等方司獻納遽有敷陳且述前文顧張具樂誠嘉謨議實所未遑所請宜不允

百僚等表請郊禮舉樂不允詔

景德二年七月丁卯

恭以長樂上僊寢園甚邇從宜聽政雖遵易月之規改及慎終式重化民之道聿觀封䟽載述輿情冀因享類之辰且舉翕純之奏然念奄鍾荼蓼甫易槐檀增感慕以彌深聽鏘洋而未忍誠違乃意難奪予情所請宜不允

谷學臣王上表乞舉樂詔

景德三年六月戊戌

朕念匪莪之哀昌嘗誓志顧在懸之奏未忍遽聞卿等以日月其除表章屢上請舉同和之樂用符順變之文且述三年之不為慮隕六代之前典勉從獻可良功至懷所請宜允

皇后崩用十三日釋服詔景德四年四月丁亥

帝王禮樂泯襲不同因事從宜亦存前訓今者宮闈違戚官司定議
質聖祖之舊章協宗周之令典顧循讜議特有公情用導盡傷亦救
風化朕今用十三日釋服

答群臣再表請舉樂詔景德四年八月辛亥

向以椒掖纒災軒宮虛位音徽如昨弦望屢移雖清廟安神已伸常
享而廣庭備樂焉可遽聞卿等以久畢公除備陳典禮在簡編之所
述故事雖存且金石之具揚予心未忍將從勤請亦貴酌中啟宴享
於高秋暫停雅奏俟冬正之令節即允乃誠咨爾近臣當體朕意

晉國賢靖大長公主喪罷聖節上壽詔

大中祥符二年十二月辛巳

惟姊之親愛均於同氣終天之訣哀切於深衷屬以誕節屆辰庶邦
畢會有司獻議願罷樂懸在於朕心亦所未忍俾停展禮用表追懷

其日群臣上壽宜令權罷

真宗喪服臣僚請聽政表不允批荅

省表具之朕鑒爵奄鍾哀號固極仰遵遺命勉嗣丕圖諒闇不言抑聞舊制嚮明視事實所未違卿等遽有奏封歷陳忠款且以襄區至廣機務寔繁爰冀眇躬親聽覽顧茲荒隕難議俞從所請宜不允

第二表不允批荅

省表具之朕日對几筵伏增號慕茹荼在疚踏地無容卿等荐貢封章備陳典禮將期寡昧親覽敢經顧此哀荒難遂誠請所請且不允

第三表允批荅

省表具之朕奉憑几之言荷承祧之重哀荒在疚戰兢靡寧顧惟眇冲固知攸濟卿等講求典故表率群倫荐拜封章願親機務諒傾輸而備至且堅確以不迴勉徇所陳允增愧傷所請宜允

為保慶皇太后加服詔景祐三年十一月辛巳

朕以保慶皇太后早在先朝已正次妃之位洎膺顧命復升亞極之尊荐示推崇遂增顯號盖夙深於慈育克保就於眇冲方叶燕寧奄經災孽追念擁全之愛曷勝痛慕之懷覽禮官之上言明喪紀之有數雖云舊典未稱予衷宜遵加服之文用申報德之志令特服小功五月用易月之制五日而除今月九日已後特未視事十七日十九日只御延和殿二十一日前殿仍特服素紗幘頭淡浹衣黑鞋帶俟祔廟畢依常服

以獻穆大長公主薨宰相乞聖節舉樂不允批荅

景祐二年三月丙午

故齊國獻穆大長公主先帝同體為朕諸姑宗黨所嚴尊親莫甚焉捐外館增悼予衷屬誕節之適期有稱觴之曩制俾毋舉樂用以稱情乃援降服之文請御在廷之奏義之所厚情固難勝所請宜不允

賜文武百僚宰臣韓琦已下乞聽政第一表不允批荅

省表具之失以朕眇未之身遭國大故嫫嫫在疚若無所容而有司列章遽以聽事為請夫三年之喪猶未成服適欲臨便殿見羣臣其可得虜所請宜不允

賜文武百僚宰臣韓琦已下乞聽政第三表宜允批荅

省表具之朕奉先帝顧命以畀付四方夙夜憂懼若涉淵冰今雖悲哀之中不敢違公卿大夫之言以起國事然而斷恩從變不亦喪紀之薄虜所請宜允

賜文武百僚宰臣韓琦已下請御正殿第一表不允批荅

省表具之朕罹國之憂不及行高宗諒闇之事固已慙然于懷今易月而除公卿大夫又欲朕御火昕之朝以延見羣臣朕哀荒未已鬱乎大道將何以處之哉所請宜不允

賜文武百僚宰臣韓琦已下請御正殿第二表不允批荅
省表具之予惟國大憂而不能執三年之通喪蓋已徇公卿大夫之
言日從事于便坐矣今復俾予臨正朝以垂聽天下之治顧懼然而
哀不勝雖曰祖宗之故事豈予小子所敢循乎所請宜不允

賜文武百僚宰臣韓琦已下請御正殿第三表宜允批荅
省表具之夫喪親者自天子至于庶人禮不敢渝也予遭家之難茹
懷荼苦朝夕靡勝卿等方謂國之萬機不可以曠日至三陳悃悃之
言顧雖弗從然祖宗之制庸可廢乎所請宜允

賜文武百僚宰臣韓琦已下第二表已舉樂不允批荅

省表具之朕荷顧言之重保成業之艱躬信誓以永思奉燕詒而終
裕施大昌報創深靡窮且宮陳沆陰俯順縞織之變而賓觴在御忍
聞金石之音覽封奏之爰來握禮文而甚備顧於匪德誠所未安所

請宜不允

批荅羣臣請聽政表

顧惟冲人遭家不造嬛嬛在疚繼序思不忘而羣臣列章廼以聽政為請夫三年之喪天下之通喪也遽欲臨便坐躬決庶政其心安乎

羣臣請御殿第一表不允批荅

正月甲戌三表乃從

朕於荒疚之中既從歷代之制出就西廂日見公卿百辟是亦足以聞政矣路朝正寢列聖於此嚮明而聽天下之治威容如在謦欬猶存予小子于茲南面何以堪諸抑所未忍也

太皇崩百官請聽政不允批荅

元豐二年十月辛酉七表乃詔易月之制定日御殿

昊天不弔大行太皇太后遽棄四海之養朕承嫡孫之重哀荒在疚而公卿大夫咸以聽事為請夫處吉廬衣縗服乃欲臨便坐見羣臣宜所稱哉所請宜不允

第二表不允批荅

省表具之方慶壽感疾之初朕已憂荒不知所從矧今朝夕遽然哀不能勝顧何暇與羣公共議天下之事哉言之勿遽以稱朕悲慕之懷所請宜不允

第三表不允批荅

省表具之四方所以聽治於朝廷者一日萬機朕固不可後也然憂艱之際羣公百辟豈不能借旬朔之期使朕得專哀疚奉喪紀以終易月之制乎所請宜不允

第四表不允批荅

省表具之成服後三日聽政此雖大行太皇太后憂念天下之遺意而舍喪圖事朕誠所未思也從權起義不亦太遽乎所請宜不允

第五表不允批荅

省表具之夫君子不奪人之喪喪亦不可奪朕緬懷大行太皇太后至恩厚德雖極情隆禮尚無以報萬分之一况哀痛之盡思慕未忘而羣公卿士乃欲斷恩從權奈何朕之致喪乎所請宜不允

宰臣吳允等請聽政第六表批荅元豐二年

省表具之易月之制雖曰從權揆之情文蓋已薄矣今朕將居其厚而卿等顧欲處之薄乎夫一日萬幾誠為甚重而羣公庶尹各共厥官則朕於致喪未言亦何曠廢之有

第七表俟終易月之制批荅

省表具之朕以慶壽棄養痛慕無窮逮喪紀之將除覽奏封之疊至請御便坐親決政機開釋之辭懇款殫盡既諭朕以奉宗廟之重又啟朕以慰寶慈之心然則喪或過哀固非中道禮之順變亦有舊章疆抑至情悲摧增功宜勉從來請俟終易月之制委有司定日施行

宰臣吳允等請御正殿不允批荅

省表具之朕自罹哀疚致喪不言勉從累請之勤彊抑無窮之痛既逾易月乃御便朝外雖攬於繁機內更深於悲慕何需章之來上祈路寢之親臨顧於聽斷之間非有重輕之繫勿為迫遽以體至情

第二表不允批荅

省表具之朕遭罹閔凶永懷哀慕外遵遺誥雖從易月之權內實致喪備舉三年之制出御便殿蓋迫羣言既已躬攬於政機奚必前臨於法座與易寧戚明稱余情以禮愛君有望卿等所請宜不允

第三表不允批荅

省表具之朕謂創鉅痛深情文宜稱至於變禮亦有從權御便座而決萬機蓋不得已臨大廷而朝百辟良所未安勉體哀悰毋煩累奏所請宜不允

第四表不允批荅

省表具之夫隆孝執喪莫先哀戚以自致從宜順變必權輕重而後行曠幾事以懷憂抑哀悼而聽政迫羣言固宣朕志哉若乃御正位於廣庭朝大廷之百辟深垂禮意殊匪人情為損則多於補奚有所請宜不允

第五表允批荅

省表具之朕自執喪以來既終易月之制雖日臨便座稍親庶政之繁而徧見羣臣尚闕大廷之對累動奏牘請御正朝返覆深思開陳備盡難遂余情之永慕當甲卿等之至誠盖徇權宜彌增哀戚宜勉依所請

宋朝大詔令集卷第一百四十六

宋朝大詔令集卷第一百四十七

典禮三十二

喪服下

慈聖祥禫畢百官請舉樂不允批荅

元豐四年十二月乙亥

朕於慈聖光獻皇后伸三年之喪以致隆極報雖竭情盡義猶未足以稱思慕之至也今禫服初徹餘哀未忘而羣公卿士乃詣閣上奏遽以聲樂為請則豈曰達朕志哉所請宜不允五表乃從

第三表不允批荅

省表具之百禮所以副達誠忱八音所以導暢和樂必惟內外之稱乃協情文之宜亟易禫縵俯臨朔旦雖經常之制已逮吉期顧怵惕之懷未忘冰慕俗觀需奏祈御韶鈞屢省惟難少安毋遽

宰臣等請聽政第一表不允批荅

元豐八年

省表具之顧惟冲遭人家不造孀孀在疚繼序思不忘而羣臣列章
廼以聽政為請夫三年之喪天下通喪也遽欲臨便座躬決庶政其
心安乎所請宜不允

荅第二表不允批荅

省表具之昊天不弔降罰于我家維予冲人宅宗衎恤攀號追慕心
焉如推而公卿大夫廼咸造於庭願公聽斷傳不云乎三年不言何
必高宗古之人皆然此朕之成法也所請宜不允

荅第三表允批荅

省表具之朕奉綴衣之託膺神器之歸創鉅痛深哀號罔極任太守
重震越何勝屢覽奏函願躬展政開諭甚至漸請益堅衎恤宅憂永
愧商宗之慕紹志述事姑從漢制之權宜允所請

宰臣等請太皇太后聽政第一表不允批荅

覽表具之上天不弟大行皇帝升遐哀慟傷推莫能勝處遽覽奏牘
請臨後庭雖政機之煩理不可緩而天性之愛情所未安所請宜不
許

荅第二表不許批荅

覽表具之火行升遐同軌號慕矧惟天性豈任哀推廼春公卿咸膺
顧託交修厥職中外晏如荐上封章荅揚未命顧從聽覽實所未遑
所請宜不許

荅第三表許批荅

覽表具之遭家不造惟國大憂悲哀從中曷能自己而公卿大夫廼
援引漢家制度與明肅光獻故事以同決政幾為請永惟宗廟之重
顧訖之深勉懋以從愧何有極所請宜許批荅如右請奉批荅付外
施行

羣臣請御正殿第一表不允批荅元豐八年三月戊午

朕遭家不造癯然宅憂冰惟萬微之繁付託之重故勉就西廂以躬庶政而公卿大夫廼以正位路朝為請夫先帝於此聽天下之治久矣銜哀永慕馨歆如存雖欲常寧以見羣臣其心安乎自是三表從之

荅第二表不允批荅

省表具之朕罹國大憂而不能執通喪之制於古人居廬未有命戒之時也已臨便坐攬政機不勝其哀與愧也況御正朝以決天下之治乎傳曰是誠在我不可以他求者也欲徇羣情實所未忍所請且不允

批荅羣臣請舉樂表元祐二年四月

省表具之禮之至者無文哀之深者無節故禪而不樂古人非以求名罔不成聲君子以為知禮朕以宗廟之重勉蹈先帝之餘烈履其

位惕然而自驚用其物潛焉而出涕未報昊天罔極之德常懷終身
不忘之憂欲從衆言亟舉備樂而金石然竹乃悽耳之聲干戚毛旄
皆眩目之具哀既未泯樂何從生再閱未章徒增感慕所請宜不允
第二表不允批荅

省表具之朕以少遭閔凶僅畢祥禪雖俛就企及非以過制為賢而
創鉅痛深不能以禮自克觀過其黨聖人許之禮曰喪三年為極亡
則弗之忘矣誠重違國老之忠告姑盡人子之至情所請宜不允

第三表不允批荅

省表具之鍾鼓以導和羽籥以飾嘉謦之飲食之節適於口體之宜
今褻麻之除莫敢踰制而琴瑟之御則有未安卿等忠誠確然開諭
至矣惟反求諸心而弗得故欲行其言而未能推之人情當識朕意
所請宜不允

羣臣請太皇太后舉樂不許批荅三元祐二年四月

覽表具之先王之禮樂因情而立史君子之哀樂自中而形外夫有
莫大之戚則有無窮之悲先皇帝天覆四方子養禹國至今窮髮之
表尚餘流涕之民而況宮闈之間母子之愛僅畢三年之制遂講八
音之和所未忍聞非不欲作卿等謹於率禮篤於愛君徒欲亟舉舊
章顧未深明吾意三復太息難於勉從所請宜不許允

覽表具之過密之制雖盡於三年追懷之私豈論於歲月金石在御
則然未寧吾不以一身之憂廢天下之樂今施之郊廟用之軍旅州
閭之會弦歌相聞獨盡餘哀止於禁中以為於義未害是故行之不
疑所請宜不允

覽表具之吾之本性以清淨寂寞為樂雖在平日無游觀聲妓之念
矧艱難之後哀戚之餘中夜以興方食而歎將不堪其憂者豈有意

於樂哉雖顧勉從未能自克忠告屢却愧歎交深所請宜不許

太皇崩請聽政第一表批荅

元祐九年

昊天降禍大行太皇太后奄棄萬方朕以眇末之身嬖孽在疚方窮永慕未知攸為而公卿大夫遽以聽事為請夫三年之喪方處苫廬未易縗服乃顧臨便座見羣臣其可得乎所請宜不允

第二表批荅

太皇太后臨制九年德澤加天下者深厚四海之人方哀傷孺慕在朕何如其情而可移覽政事乎所請宜不允

第三表批荅

朕遭家不造蚤失先帝實賴太皇太后保佑朕躬勤勞艱難于茲九載大德未報奄及升遐悼心失圖銜恤在疚卿等迫以遺諾奪其哀情雖一日萬機理難疚曠而終天至痛力未能勝毋固執於權宜庶

獲終於喪紀所請宜不允

第七批荅

朕惟先皇制禮稱情立文君子居喪與易寧戚以日易月斷恩從權祖宗以來久未違改朕外遵遺訓內服通喪雖三年不言仰企前哲而公除聽政抑有舊章卿等疊抗奏封脩殫懇朕承祖廟之重所不得辭強抑至情興言推切宜勉從來請俟終易月之制委有司施行

請御殿批荅 元祐八年十月

朕惟嫡孫承重三年之喪天下之至禮也繇漢以來始有易月之制更千有餘年後世作者頗欲加隆焉而卒莫之必朕御宸極而朝奪情從簡釋喪服臨便座固已出乎不得已覽所上章又欲朕即御宸極而朝羣臣顧誠何情而可以遽爾邪所請宜不允

第二表批荅

朕嗣位以來仰恃崇慶同御便殿端拱蒙成不圖閔凶遽失慈訓哀慕恍惚誓歎如存迫於羣言勉力聽政雖終易月之制方執三年之喪前臨正朝實所未忍興言及此心焉若摧所請宜不允

第五表批荅

朕茲問日便服延臣鄰謀大政自六卿而下缺然有間矣其職之所欲圖志之所欲竭故非臨御前朝見文武大小之臣從容聽治誠未足以盡其效事者之忠也是禮之變久矣其權夫天下之重能勿從乎所請宜允有司定日施行

哲宗喪宰臣章惇等請聽政不允批荅 元符三年正月癸未省表具之朕遭家不造奄奉嗣言推割哀情殆難勝處天下之務理不可曠而易月之喪猶未除期靡究哀恫難徇來請所請宜不允

第二表批荅 正月甲申

省表具之朕欽承末命嗣守丕圖遭家多艱罔知攸濟君臣之義通喪三年兄弟之情未踰浹日遽臨便殿以見羣臣所請未安勿申前請所請宜不允

第三表不允批荅 正月乙酉

省表具之天降割于我家末予冲人惟初嗣服未堪多難而羣公卿士屢援故常請視庶政喪紀之制不以薄乎所請宜不允

第四表不允批荅

省衣其之先王制禮服循中道後世因時適變已為從宜今仍儿之言猶新而日月之除尚遠起圖政事其得安乎所請宜不允

第五表允批荅

省表具之朕欽承基緒未堪多艱喪服猶新哀恫靡究羣公卿士咸

造在廷屢率故常請親聽斷付託之重罔敢不欽用抑哀情勉從衆志所請宜允

宰臣章惇等請御正殿不允批荅元符二年正月

省表具之宋予冲人嗣大厯服三年之制從義斷恩易月未祥已臨使座哀恫靡究於德有慙而羣公卿士咸欲御正朝路寢以聽天下其可安乎所請宜不允

第二表不允批荅

省表具之朕罹國大憂未堪多難勉從羣請起聽萬機已御西廂亦足為政執喪從事固以為慙出視正朝尤乖禮制所請宜不允

第三表允批荅

省表具之朕惟古之服喪者與其易也寧戚今順變從宜練而聽事考之喪紀甚有愧焉而公卿近臣藩衛庶長皆請正宁之朝不可久

虛俯而就之厥有常典銜哀南面良周盡然所請宜允

宰臣韓忠彥等請吉服不允批荅九月庚午

參攷僉言蔽自朕志仰念繼承之義宜服三年之喪嘗告治廷衆論
惟允難以中道復議所更所請宜不允

第二表不允批荅

頓釋素衣遽御吉服情弗忍也義豈安乎宜體至懷毋堅勤毋請所請
宜不允

第二表允批荅

覽卿等章奏陳叙再三參攷著明義難固抑所請宜允續奉御寶批
覽卿等累次所上章奏請易服遂不得已而從可後周期服吉

罷小祥從吉詔建中靖國元年

朕纂圖宸極繼及承祧祇奉泰陵適追先服遽難伊始數告具存而

元符末年異論蜂起秋宗宰輔或有建言力陳日侍親闈豈可久衣素釋援經執禮引義制情批喻再三章却復上開諭弗已抗疏愈堅茲時方侍慈顏顧念難伸素志勉從所請中實盡傷致養既終因心可展奉遵初詔用慰紹承已依元降服喪三年之制其元符三年九月自小祥從吉指揮宜改正庶盡厚終之義稱予繼序之誠布告中外咸使聞知

皇太后上仙後宰臣韓忠彥等請聽政不允批荅

省表具之昊天降凶大行皇太后棄隆祐之養朕方哀摧荒塞公卿大夫乃請聽事夫捨苦廬之戚而圖國政豈情所安哉所請宜不允

第二表不允批荅

省表具之朕惟大行皇太后保佑眇躬福被四海方朝夕悲慕不勝而羣公卿士乃欲朕臨便朝親萬幾無乃大遽乎夫寢苦以致人子

之哀義固難奪而御殿以聽天下之政情所未安所請宜不允

第三表不允批荅

省表具之人子之喪親也擗踊哭泣惟哀為至齊衰枕塊默而不言遽可以使座言政哉公卿百辟請之雖勤非人情之厚違禮義之經所請宜不允

第四表不允詔

省表具之朕以上天降罰創鉅痛深致喪不言號號在疚而欲見羣臣議廢政所未暇也傳不云乎親喪固所自盡今公卿大夫乃以義奪情使不得終易月之制豈亮朕懷乎所請宜不允

第五表不允詔

省表具之昔之居喪百官備百物具不言而事行者扶而起之各有司存今百官不備乎百物不具乎方在哀收何閒而急於聽事邪徐

之勿遽所請宜不允

第六表不允詔

省表具之朕惟一日二日萬幾不言臣下固依稟令固知聽斷不可緩也恭以慈懷至思思以為報昊天罔極方朝夕銜恤以致終慕之情豈忍捨喪以為屑公議天下之政哉所請宜不允

第七表允批荅

省表具之以日易月兩漢而下從權若聖與仁三年之喪寧戚朕祇承遺訓參攷舊章雖終身之慕無窮而羣工之請益至永惟萬事之統聽予一人之歆強抑哀摧俯徇誠款宜允所請委有司定日施行

請御正殿不允批荅

省表具之惟天不弔降割我家既終易月之期俯徇羣公之懇出臨便座日聽萬幾哀慕之心豈有窮已復觀奏牘請聽正朝禮有從權

固已勉親於庶政情所未忍豈且遽即於廣廷所請宜不允

第二表不允批荅

省表具之朕遣罹憂恤創鉅痛深日月逾邁勉徇羣請出御使殿躬覽政機夫禮根性情因為之節前即治朝以臨百官豈稱朕哀戚之情歟所請宜不允

第三表不允批荅

省表具之朕罹恤茹憂每深側席易月聽政勉以從權方懷孺慕於東朝遽忍即安於南面體予哀疚母憂布陳所請宜不允

第四表不允批荅

省表具之居廬銜恤是惟孝子之情制變從權蓋亦先王之事朕自罹哀疚俯迫羣言內遵喪紀之三年永聽便朝之庶政不得已也何痛如之復累覽於需章欲前臨於法座雖懷體國之義未克致哀之

心所請宜不允

第五表允批荅

省表具之朕遭罹閔凶奄奪慈訓既踰易月勉徇羣情憂勞雖摠於萬機悲慕豈忘於一日而卿等言皆考古義則愛君服天下之通喪固先哀戚從聖人之變禮盖有權宜即班朝之常居乃肆覲於羣辟治之火也朕其從焉所請宜允

蔡京乞舉樂批荅

大觀二年三月

蔡京等省所上表伏望遵景德之詔音禮由義起御鈞天之法部樂與民同事具悉昔我懿后來嬪潛濬發祥震維正位坤極壽不副德文以稱情姑輟雅音有懷時昔覽羣公之奏牘校本朝之舊章禮不敢逾義當從請所請宜允

宋朝大詔令集卷一百四十七